

致遠軒吟草

劉衛林

題東坡先生畫像

先生抱才具。詩書空滿腹。文章專一壑。名高身數辱。燕石世同珍。無人惜荆玉。直道宜偃蹇。自反何曾縮。瓠落無所容。離居共麋鹿。日飽東坡飯。眼亂行看竹。隱几學維摩。楞嚴久不讀。彭澤貧無酒。山中有老宿。材大何須用。越俎笑尸祝。文字累平生。艱貞俟來復。我亦幽居士。滄浪思濯足。每讀先生詩。登音聽空谷。今對先生像。竄然清心目。苦恨未相從。南村共卜築。

梅花三首

獨抱清芬草棘中。寒心與我兩相同。漫山桃李春容好。卻愛幽姿對冷風。

身世蕭蕭暮雨中。逢春寥寂與君同。枝頭嶺上幽香冷。的磔橫斜一笛風。

但惜孤芳坎壈中。幽人何日一尊同。江南煙雨相逢後。每憶清香徹晚風。

山居秋夜

山居夜岑寂。起坐聽秋聲。萬壑松風動。一林疏影橫。對燈思舊侶。撫劍感平生。何必獨憔悴。幽懷羈世情。

答內人問詞苦之故

乙酉秋分後一日。晚來風雨不休。中夜不寐。於蕭蕭雨聲中。忽憶內人燈下讀日前所草諸篇有問。遂書拙句於茫茫苦夜待曉之中。

筆下緣何苦。窮愁始有詩。離居庶無悶。稟氣自違時。世道沉淪久。衡門歸去遲。感君憐素抱。咫尺雅相知。

讀寅恪先生紅樓夢新談題辭詩有感

憐君往日說閻浮。飄泊身如不繫舟。衰世策名原可笑。殘年飽飯復何求。空華陽燄依稀夢。眾鳥孤雲寂寞秋。寸斷剛腸寧有恨。星霜白髮已盈頭。

答和故人問疾

別來終日看雲浮。夜半虛藏壑內舟。歲月蹉跎成易得。詞章親厚已難求。茂陵風雨憐雙鯉。嘉會河梁隔九秋。海嶠相逢應笑我。何殊病起少年頭。

丙戌元旦懷洪肇平教授及何乃文教授次韻東坡會客有美堂詩

春回此日放晴雲。草際浮光漾綠裙。紫陌芳菲花映鳥。微風澹蕩水成紋。清新詞賦憐開府。瀟灑風神憶右軍。趨謁何時一尊酒。旗亭陪唱慰襟分。

次韻東坡過密州詩

莫笑先生與我貧。詩窮一例不須嗔。五湖獨釣滄浪月。千

載猶傷澹蕩人。白髮催成歸隱計。青山老卻放閒身。玉壺
盼得東坡老。共醉江城箬下春。

春日雜詠二首贈城大舊生

開荒南畝古為徒。九畹滋蘭春已蕪。微雨東風芳草綠。子
規聲裏憶同途。

幾年問學各南圖。待看扶搖萬里途。風教沉淪思共勉。傳
薪有願託吾徒。

奉答長者有感見寄

高吟先賜我。平生所欣忭。敢恃忘年交。陋句抒所羨。三
紀效于飛。鶴鶻神仙眷。四海共遨遊。逍遙雙侶燕。比
翼話情深。相攜知繾綣。天涯樂賞心。登臨殊未倦。阮公
澹蕩人。文章信英彥。此日甘退藏。冷暖世情見。寂寞衡
門下。杯酒思狂狷。高節照時人。素抱何曾變。犢鼻寧免
俗。放歌聊自遣。舉案有同心。何須傷貧賤。